

Fasnecht 2024



**Sujet:**

## **Überall hets Pilzli dra**

E langi Zit sin mir deheime blibe  
Alli Läden hend geschlossen an d Schiebe gschriebe  
Es Deheime Büchli hei sich viele ahgfresse  
Hygiene Prinzipie scho bald vergesse

Vor luter Hoor scho bald nüm viel gseh  
In keim Restaurant me chönne es Kaffi neh  
Das cha doch nid so witter go hei viele denkt  
So het mr eus nachem End, s alte Lebe gschenkt

Lieschtel präsentiert sich imene neue und modernere Bild  
Dr neuu Bahnhof s neue Lieschtler Ushängeschild  
Im Stedtli ischs noni so wiit und alles isch bim Alte  
Hoffentlich chönne mir de Charme no bitsli witter bhalte

Lieschtel attraktiv und zum verwiile ahlocke  
All paar Meter chasch bimene andere Coiffure ahnehocke  
Im Stedtli oder im Bücheli lauft mr grad dra ahne  
Fast überall, hängt e sone grossi Coiffurefahne

D Männer hei sich au im 2023 uf altbewährts fokussiert  
Obe schniide und dr Undercut mit dr Klinge rasiert  
Doch anderscht ischs cho, wer het so öpis denkt  
Dr Coiffure het ihne nämli nachem Hoorschnitt no Pilzli gschenkt

Trychophyton tonsurans heisst de ganzi Gspass  
Bi somene Name werde au mir Chnobis Blass  
E rote Ring ufem Chopf und drzue no Hoorverluscht  
Bisse duets au, was füre Männer Fruscht

So het 2023 wieder e neue Virus d Nerve strapaziert  
Und isch über d Köpfe vo Lieschtel stolziert  
Ummegange isches in dr Region wie e Grippe  
Hette doch d Coiffure nur mit sübere Messer gschnitte

So simmer also wieder zrugg, in de alte Zite  
Zrugg in de Täg, wo s BAG meint s muess Zittige betitle

Zum guete Glück ischs nur in Lieschtel bliebe  
Und eusi Ärzt hei dr Virus ganz rasch vertribe

E wittere Teil vonere historische Lieschtler Gschicht  
Mir spiele sie us und präsentiere eusi eigeni Sicht  
Es isch ebe nid nur dr Lieschtler Ma  
Au mir Chnobis zeiges, überall hets Pilzli dra

Wie scho bi viele Sujet's chömme mir zum Schluss mit dr richtige Idee  
Mir überemme das Coiffure-Business und düend e wittere Input geh  
Qualität brucht Zit und wird bi eus au zimli öpis choste  
Drführ hesch am Schluss kei Pilz ufem Dach vo jedem Lieschtler  
Pfoschte